

Uunga siunnersuut: Akileraaruserinermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx af xx. xxx 2014

aamma uunga siunnersuut:

Isertitanit akileraarutit pillugit Inatsisartut inatsisaata allanngortinnera pillugu Inatsisartut inatsisaat nr. xx af xx. xxx 2014-imeersoq

(Aningaasaqarnermut Nunamullu Namminermut Naalakkersuisoq)

Saqqummiussissut

(Aningaasaqarnermut Nunamullu Namminermut Naalakkersuisoq)

Siullermeerneqarnera

Naalakkersuisut sinnerlugit matumuuna inatsimmut Akileraaruserinermik ingerlatsineq pillugu Inatsisartut inatsisaata allanngortinneqarnera pillugu Inatsisartut inatsisaat nr. xx af xx. xxx 2014, aamma inatsimmut Isertitanit akileraarutit pillugit Inatsisartut inatsisaata allanngortinnera pillugu Inatsisartut inatsisaat nr. xx af xx. xxx 2014-imeersoq pillugit siunnersuutinik saqqummiussissaanga.

Namminersorlutik Oqartussat kommunillu suleqatigiinnissamut isumaqatigiissutaannut nassuiaat tunngavigalugu, Naaalakkersuisut, kommunit Kanokokalu januar 2014-imi missingersuusiortarnermut suleqatigiinnissamik nutaamik isumaqatigiissuteqarput. Isumaqatigiissuteqarnikkut isumannaarneqassapput pisortat suliassaqarfiini tamani aningaasaqarnikkut ineriartortitsinermut attanneqarsinnaasunik aaqqiisoqarnissaa, innuttaasunik suliffeqarfinnillu sullissinermut pitsaasunik tunngavissiiñissaq siunissamullu isigaluni pilersaarusiortarnerup toqqammavilersorneqarnissaa.

Missingersuusiortarnermut suleqatigiinnissamik isumaqatigiissummut ilaavoq naligiissaarisarnermut ataatsimoortumillu tapiissuteqartarnermut ataatsimik ataatsimoortumik nutaamik ilusiliinissaq suliarineqassasoq. Ataatsimik ataatsimoortumik ilusiliinerup kingunerissavai maannakkut ilusiliussamut naleqqiullugu pisariinnerulersitsineq paasiuminarnerulersitsinerlu.

Aaqqissuussineq nutaaq atuutilissaaq 2015-imi. Taamaattumik ataatsimoortumik kommuninut akileraarusiisarneq 2015-imiit atuutilersumik atorunnaarsinneqassaaq. Maannakkut ataatsimoortumik kommuninut akileraarut 6 pct.-inik annertussuseqarpoq. Ataatsimoortumik kommuninut akileraarutip atorunnaarsinneqarnerata kingunerisaanik

inuttut isertitanit kommuninut akileraarut annerpaamik 30 pct.-iniit 36 pct.-inut qaffanneqassaaq.

Taannaannallu inatsisissatut siunnersuutip kingunerissavaa ataatsimoortumik kommuninut akileraarutip naligiissaarisarnermik aqqissuussinermut ilaajunnaarnera. Tamatuma kingunerisaanik inatsisissatut siunnersuutikkut taannaannaatillugu isigalugu kommunit aningaasarissaarnerusut aningaasaqarnerat pitsanngoriartinneqassaaq, kommunillu aningaasassaaleqisut aningaasaqarnerat ajorseriartinneqarluni.

Tamanna naligiissaarisarnermik ataatsimoortumillu tapiissuteqartarnermik nutaamik ilusiliinikkut illuatungilerneqassaaq. Nutaamik ilusiliinikkut kommunit akornanni agguaassisarneq allanngortinneqassasoq naatsorsuutigineqarpoq, taamaalillutik Kommuneqarfik Sermersooq aamma Qeqqata Kommuniania ataatsimut isigalugu Kommune Kujallermut aamma Qaasuitsup Kommunianut maannakkut aqqissuussinermik akiliuteqarnerusalissallutik, taamaammat kommunit aningaasarissaarnerusut kommunit aningaasassaaleqisut aningaasaqarnerannut sulii annertunerusunik akileeataasalissallutik.

Taama Naalakkersuisut sinnerlugit oqaaseqarlunga siunnersuutit Inatsisartunut suliaannangortippakka.